

Expediente IET: P-22-243
Proxecto: Parque Eólico Outeiro Grande
Concello: A Estrada e Forcarei (Pontevedra)
Promotor: AV Outeiro Rubio SLU

INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 10/06/2022 o Servizo de Enerxía e Minas de Pontevedra somete a informe do Instituto de Estudos do Territorio (IET) documentación relativa ao proxecto de parque eólico Outeiro Grande.

1. Antecedentes:

Con data do 07/04/2022 o IET emitiu un informe de impacto e integración paisaxística, de acordo co previsto no artigo 11.3 da Lei 7/2008. Nese informe indicábase que o estudo de impacto e integración paisaxística (EIIP) elaborado non se axustaba completamente ao disposto na Lei 7/2008, do 7 de xullo, de protección da paisaxe de Galicia, e ao Regulamento da Lei 7/2008. Así mesmo facíanse unha serie de consideracións sobre distintas medidas que debería adoptar o proxecto para minimizar os impactos e acadar unha mellor integración paisaxística.

2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia, aprobado polo Decreto 96/2020, do 29 de maio (RLPPG).

En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se avaliarán os efectos e impactos que o proxecto poida provocar na paisaxe e as medidas de integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do RLPPG.

3. Análise do EIIP, dos efectos do proxecto sobre a paisaxe e das medidas de integración paisaxística:

A documentación achegada polo Servizo de Enerxía e Minas de Pontevedra consiste nunha addenda ao EIIP (maio 2022). Nesta addenda lévase a cabo unha análise da visibilidade nun ámbito de 20 km e de xeito individualizado para cada elemento de valor, aportando montaxes fotográficas que simulan a visibilidade dende algúns elementos de valor e núcleos



próximos. Xustifica como se incorporaron ao proxecto as determinacións das directrices de paisaxe e establece unha serie de barreiras vexetais no entorno dos núcleos rurais.

Que se coñeza, non se produce ningún cambio no deseño das instalacións, polo que os seus efectos sobre a paisaxe serán os que xa se valoraron en anteriores informes.

En canto ás medidas preventivas e correctoras previstas no EIIP, poden considerarse, en xeral, adecuadas para reducir ou mitigar os impactos sobre a paisaxe. Se ben, no relacionado coas barreiras vexetais propostas, deberanse empregar especies autóctonas, polo que non cabe o uso de *Cupressus x leylandii*.

4. Conclusión:

A nova documentación presentada ven a completar o EIIP do proxecto polo que pode considerarse cumprimentado o disposto no artigo 11.2 da Lei 7/2008 e nos artigos 26 e seguintes do RLPPG.

O principal impacto paisaxístico deste proxecto será a incidencia visual producida polos aeroxeradores, que pola súa forma e altura, serán visibles desde unha ampla extensión de terreos e a longas distancias; esta incidencia perdurará no tempo durante o período de explotación do parque, e verase incrementada polo efecto sinérxico derivado da presenza doutros parques eólicos na contorna. Neste caso, entre as zonas afectadas pola incidencia visual cabe destacar a AEIP Monte de San Sebastián e o seu miradoiro asociado así como os núcleos máis próximos. Segundo a análise de visibilidade levada a cabo na addenda confírmase o forte impacto visual producido sobre a AEIP Monte de San Sebastian, se ben non se pode considerar crítico. En calquera caso, o impacto visual non poderá ser mitigado con medidas correctoras, a excepción do que afecta aos núcleos rurais, para os cales, de existir unha manifesta preocupación social polo impacto visual dos aeroxeradores, adoptaranse as medidas establecidas no EIIP para a creación de barreiras vexetais, se ben as especies empregadas deberán ser autóctonas.

En todo caso, de acordo co artigo 30.3 do RLPPG, as medidas de integración paisaxística deberán quedar oportunamente recollidas no proxecto.

Non será necesario someter a documentación a novo informe do IET.

José Luís Álvarez Vicente
Xefe do Servizo de Planificación da Paisaxe

José Antonio Serantes Barbeito
Director do Departamento Técnico de Estudos

Visto e conforme, Enrique Luís de Salvador Sánchez
Director do Instituto de Estudos do Territorio

(Na data da sinatura electrónica)

